

伊川擊壤集卷之四

天津新居成謝府尹王君貺尚書

嘉祐七年

嘉祐壬寅歲新巢始僦功仍分道德里更近帝王宮
檻仰端門峻軒迎兩觀雄窓虛響漉澗臺迥璨伊嵩
好景尤難得昌辰豈易逢無才濟天下有分樂年豐
水竹腹心裏鸞花淵藪中老萊歡不已靜節興何窮
嘯傲陪真侶經營賀府公丹誠徒自寫匪報是恩隆

新春吟

多病筋骸五十二新春猶得共銜杯踐形有說常希
孟樂內無功可比回燕去燕來徒自苦花開花謝漫

相催此心不爲人休感二十年來已若灰

有客吟

伊嵩有客欲無言進退由來盡俟天好樂未能忘水石樂閑非爲學神仙休嗟紫陌難爲客且喜清風不用錢枉尺直尋何必較此心都大不求全

小圃逢春

隨分亭欄亦弄妍不妨閑傍酒壚邊夜簷靜透花間月晝戶寒生竹外煙事到悟來全偶爾天教閑去豈徒然壺中日月長多少爛占風光二十年

暮春吟

春來小圃弄羣芳誰謂貧居富貴鄉門外柳陰浮翠潤階前花影溜紅光梁間新燕未調舌天末歸鴻已著行自問心源何所有答云疎懶味偏長

惜芳菲

細算人間千萬事皆輸花底共開顏芳菲大率一春內爛漫都無十日間亦恐憂愁爲齟齬更防風雨作艱難莫教此後成遺恨把火罇前尚可攀

答人見寄

鬢毛不患漸成霜有託琴書子一雙旣乏長才康盛世無如高枕臥南窓明知筋力難爲強猶說雲山未

樹降多謝故人相愛甚轍魚幸免困西江

弄筆

行年五十二老去復何憂事貴照至底話難言到頭
上有明天子下有賢諸侯飽食高眠外自餘無所求

問人丐酒

百病筋骸一老身白頭今日愧因循雖無紫詔還朝
速却有青山入夢頻風月滿天誰是主林泉遍地豈
無人市沽酒味難醇美長負襟懷一片春

答客

人間相識幾無數相識雖多未必知望我實多全爲
道知予淺處却因詩升沈休問百年事今古都歸一
局碁乘馬須求似騏驥奈何騏驥未來時

悟人一言

百慮謀猶拙一言迷自開世間無大事天下有雄才
唯恐人難得寧憂道未恢忌心都去盡何復病塵埃

謝人惠筆

愛重寄文房慙懃謝遠將免毫剛且健筠管直而長
靜錄新詩藁閑抄舊藥方自餘無所用足以養鋒鋞

書事吟

天地有常理日月無遁形飽食高眠外率是皆虛名

雖乏伊呂才不失堯舜氓何須身作相然後爲太平
雙頭蓮

漢室嬋娟雙姊妹天台嫖妙兩神仙當時盡有風流
過謫向人間作瑤蓮

答人書意

仲尼言正性子輿言踐形二者能自得殆不爲虛生
所交若以道所感若以誠雖三軍在前而莫得之凌

答人書言

無位立事難逢時建功易求全自有毀舉大須略細
去惡慮傷恩存惡慮害義徒有仁者心殊無仁者意

答人書

卿相一歲俸寒儒一生費人爵固不同天爵何嘗匱
不有霜與雪安知松與桂雖無官自高豈無道自貴
與人話舊

耳目所聞見且言三十春纔更十次閨已換一番人
圮族綺紈故朱門車馬新從來皆偶爾爾何者謂功勳
閑吟

忽忽閑拈筆時時樂性靈何嘗無對景未始便忘情
句會飄然得詩因偶爾成天機難狀處一點自分明
閑坐吟

當年計過之今日事難隨天命不我祐雲山聊自怡
無何緣淡薄遂得造希夷却欲嗤真宰勞勞應不知

天津閑步

天子舊神州葱葱氣象浮園林閑近水殿閣遠橫秋
浪雪暑猶在橋虹晴不收人間無事日此地好淹留

天津幽居

予家洛城裏況復在天津日近先知曉天低易得春
時光優化國景物厚幽人自可辭軒冕閑中老此身

天津水聲

洛水近吾廬潺湲到枕虛湍驚九秋後波急五更初

細爲輕風背豪因驟雨餘幽人有茲樂何必待笙竽
不寢

閑坐更已深就寢夜尚永展轉不成寐却把前事省
莫枕時昏昏擁衾還耿耿西窓明月中數葉芭蕉影

天宮小閣

夏日到天宮凭欄望莫窮古人用心遠天子建都雄
樓觀深雲裏山川暮靄中行人漫來往此意有誰同

聽琴

琴宜入夜聽別起一般情纔覺哀猿絕還聞離鳳鳴
青山無限好白髮不須驚會取坐忘意方知太古心

天津感事二十六首

雲輕日淡天津暮風急林疎洛水秋獨步獨吟人莫
會時時鷗鷺下汀洲

寵辱事多今不見興亡時去止堪哀請觀今日長安
道抵暮行人猶往來

鳳樓深處鎖雲煙一鎖雲煙又百年痛惜汾陰西祀
後翠華辜負上陽天

誰引長河貫洛城鑿輿東去此爲輕洪濤不服天津
束日夜奔騰作怒聲

陽鳥西去水東流今古推移幾度秋四面遠山長斂
黛不知終日爲誰愁

忙忙負乘兩何殊往復由來出此途爭似不才閑處
坐平時雲水遶衣裾

人言垂釣辨浮沈辨著浮沈用意深吾耻不爲知害
性等閑輕動望魚心

自古別都多隙地參天喬木亂昏鷗荒垣壞堵人耕
處半是前朝卿相家

鳳凰樓觀冷橫秋橋下長波入海流
百年來舊朝市幾番人向此經由

輪蹄交錯未嘗停去若相追來若爭料得中心無別

事苟非干利即干名

煙樹盡歸秋色裏
人家常在水聲中
數行旅鴈斜飛去
一簇樓臺峭倚空

淶水悠悠際碧天
平蕪更與遠山連
白頭老叟心無事
閑凭欄干看洛川

去年橋上凭欄人
今歲橋邊騎馬身
橋上橋邊不知數
於今但記十三春

隄邊草色長芊芊
陌上行人自往還
淶水欲淨不得淨
春風未放柳條閑

水流任急境一作景常靜
花落雖頻意自閑
不似世人

忙裏老生平未始得開顏

溪邊閑坐眼慵開
波射長隄勢欲摧
多少水禽文彩好
幾番飛去又飛來

名利從來本任才
行人不用苦相猜
壺中日月長多少
閑步天津看往來

地勢東南一槩傾
水流何日得安平
天津更在急流處
無限高深併此聲

三千里外名荒服
一百年來號太平
爭似洛川無事客
何須列土始為榮

遶隄楊柳輕風裏
隔水樓臺細雨中
酒放半醺重九

後此時情味更無窮
著身靜處觀人事
放意閑中鍊物情
去盡風波存止
水世間何事不能平

隋唐而下貴公卿
近世風波走利名
借問天津橋下
水當時湍激作何聲

前朝無限貴公卿
後世徒能記姓名
唯此天津橋下
水古今都作一般聲

雲無一縷干明月
橋有千尋臥淥波
料得人間無此
景中秋對月與何如

郊鄆城中同德友
鳳凰樓下會中秋
芳罇倒盡人歸
去月色波光戰未休

了生始可言常事
知性方能議大猷
只此長川無盡
夜爲誰驅逼向東流

誠明吟

孔子生知非假習
孟軻先覺亦須脩
誠明本屬吾家
事自是今人好外求

繩水吟

有水善平難善直
唯繩能直不能平
如將繩水合爲
一世上何憂事不明

辛酸吟

辛酸既不爲中味商徵如何是正音舉世未能分曲
直使誰爲主主心平

言默吟

當默用言言是垢當言任默默爲塵當言當默都無
任塵垢何由得到身

閑居述事

一點天真都不耗千鍾人祿是難來太平自慶無他
事有酒時時三五杯
竹雨侵人氣自涼南窓睡起望瀟湘茅簷滴瀝無休
歇却憶當初宿夜航

初晴月向松間出盛暑風從水面來已比他人多數
倍況能時復舉罇鼻
堂上慈親八十餘階前兒女笑相呼旨甘取足隨豐
儉此樂人間更有無

清歡少有虛三日劇飲未嘗過五分相見心中無別
事不評興廢只論文
花木四時分景致經書千卷號生涯有人若問閑居
處道德坊中第一家

天宮小閣納涼

小閣凭虛看洛城滿川雲物拱神京風從萬歲山頭

至多少煙嵐併此清
小閣於吾有大功清涼冠絕洛城中自慙虛薄誠多
幸襟袖長涵萬里風
小閣清風豈易當一般情味若羲皇洛陽有客不知
姓二十年來享此涼

天宮幽居卽事

人苦天津遠來須特特來閑餘知道泰靜久覺神開
悟易觀碁局談詩捻酒盃世情千萬狀都不與裝懷

遊龍門

江天無少異幽鳥下晴沙路去山形斷川迴渡口斜
龕巖千萬穴店舍兩三家清景四時好都城況不賒

重遊洛川

買石尚饒雲買山當從水雲可致無心水能爲鑑止
性以無心明情由鑑止已二者不可失出彼而入此
川上觀魚

天氣冷涵秋川長魚正遊雖知能避網猶恐悞吞鈎
已絕登門望曾無點額憂因思濠上樂曠達是莊周

己丑四月十二日校改九字補一字藏園主人

伊川擊壤集卷五

○○○後園卽事三首

嘉祐八年

太平身老復何憂
景愛家園自在遊
幾樹綠楊陰乍
合數聲幽鳥語
方休竹侵舊徑
高低迸水滿春
渠左
右流借問主人
何似樂答云殊
不異封侯

天養疎慵自有方
洛城分得水雲鄉
不聞世上風波
險但見壺中日
月長一局闌棋
畱野客數盃醇
酒面
脩篁物情悟了
都無事未覺顏
淵已坐忘

年來得疾號詩狂
每度詩狂必命觴
樂道襟懷忘檢
束任真言語省
思量賓朋款密
過從久雲水優
閑興

味長始信淵明深意在北窗當日比羲皇

觀棋長吟

院靜春深晝掩扉竹間閒看客爭棋搜羅神鬼聚胸臆措置山河入範圍局合龍蛇成陣鬪劫殘鴻雁破行飛殺多項羽坑秦卒敗劇符堅畏晉師座上戈鋌嘗擊搏面前冰炭旋更移死生共抵兩家事勝負都由一著時當路斷無相假借對人須且強推辭腹心受害誠堪懼唇齒生憂尚可醫善用中傷爲得策陰行狡獪謂知機請觀今日長安道易地何嘗不有之

秋日登崇德閣二首

無限英賢抑壯圖登臨不用起長吁山川千古戰爭後冠劔百年零落餘浪把功名爲已任那知富貴豈人謨丹青曲盡世間妙寫得凭欄意思無
一百年來號太平當初仍患不丁寧京都尚有漢唐氣宮闕猶虛霸王形煙外亂峰纔隱約霜餘紅樹半凋零樽中有酒難成醉旋被西風吹又醒

秋日飲後晚歸

水竹園林秋更好忍把芳樽容易倒重陽已過菊方開情多不學年光老陰雲不動楊柳低風遞輕寒生
莫早無涯逸興不可收馬蹄慢踏天街草

寄陝守祖擇之舍人

記得相逢否當時在海東別離千里外倏忽十年中
跡異名尤異心同齒更同終期再清會文酒樂無窮
哭張元伯職方

近年老輩頻凋落使我心中又惻然洛社掛冠高卧
者唯君清澈如神仙昔者與君論少長今日與君爭
後先把酒酌君君必知爲君灑淚西風前

哭張師柔長官

生平志在立功名誰謂才難與命爭絕筆有詩形雅
意蓋棺無地盡交情胸中時事何由展天下人才不
復評魂若有知宜自慰子孫大可振家聲

和登封裴寺丞翰見寄

治平三年

陋巷簞瓢世所傳予何人則恥蕭然旣知富貴須由
命難把升沉更問天靜默有功成野性騫驤無路學
時賢紛華出入金門者應笑溪翁治石田

何事吟寄三城富相公

何事教人用意深出塵些子索沉吟施爲欲似千鈞
弩磨礪當如百鍊金釣水誤持生殺柄著棋閒動戰
爭心一盃酒美聊康濟林下時時或自斟

代書寄友人

當年有志高天下嘗讀前書笑謝安豈謂此身甘老
朽尚無闢地可盤桓棋逢敵手纔堪著琴少知音不
願彈非止不才能退默古賢長恨得時難

訪姚輔周郎中月陂西園

相憶不可遏西街來訪時交橫過溝水隙曲遶蔬畦
樹偃低頭避筇高換手持朋遊相得甚何樂更如之

依韻謝登封劉李裴三君見約遊山

諸公見約往嵩前重走新詩各一篇擺落塵埃非敢
後訪尋雲水奈輸先三陽宮近叢幽石萬歲峰高羃
紫煙多少勝遊俱未到願陪仙躅共攀緣

登嵩頂

九州環遶若棋枰萬歲嵩高看太平四海有人能統
御中原何復有交爭長憂眼見姦雄輩且願身爲堯
舜氓五十三年蕪没事如今方喜看春耕

登封縣宇觀少室

天地始融結此山已高極羣峰擁旌幢巨石羅劔戟
日出崖先紅雨餘嵐更碧安知無神仙其間久遁跡

山中寄登封令

初離縣日謀經宿旣到山中未忍迴公宇若無民事
決願攜茶器上山來

歸洛寄鄭州祖擇之龍圖

恩深骨髓謂慈親義重丘山是故人歸過嵩陽舊遊地白雲收得薜蘿身

和祖龍圖見寄

吾家職分是雲山不見雲山不解顏遊興亦難拘日限夢魂都不到人間煙嵐欲極無涯樂軒冕何常有暫開洛社交朋屢思約幾時曾得略躋攀

緣飾吟

緣飾了時稱好手作為成處似真家須防冷眼人觀覷傀儡都無張幕遮

白況三首

名利場中難著脚林泉路上早迴身不然半百殘軀體正被風波汨未休
滿天風月爲官守遍地滿山是事權唯我敢開無意口對人高道不妨言

每恨性昏聞道晚長慙智短適時難人生三萬六千日二萬日來身却閒

偶書

紛紛議論出多門安得真儒號縉紳名教一宗長有主中原萬里豈無人皇上帝伯時雖異禮樂詩書道

自新觀古事多今可見不知何者謂經綸

代書寄商洛令陳成伯

此去替期猶半歲商山窮僻少醫名感傷多後氣防
滯成伯暑溼偏時疾易生聖智不能無蹇剝賢才方
善處哀榮斯言至淺理非淺少補英豪一二明

治平丁未仲秋遊伊洛二川六日晚出洛城西

門宿奉親僧舍聽張道人彈琴

向晚驅車出上陽初程便宿水雲鄉更聞數弄神仙

曲始信壺中日月長

七日遡洛夜宿延秋莊上

八月延秋禾熟天農家富貴在豐年一簞雞黍一瓢

酒誰羨王公食萬錢

八月渡洛登南山觀噴玉泉會壽安縣張趙尹

三君同遊

渡洛南觀噴玉泉千峰萬峰遙相連中間一道長如

雪飛入寒潭不記年

九日登壽安縣錦幘山下宿邑中

煙嵐一簇特崔嵬到此令人心自灰上有神仙不知

姓洞門閑倚白雲開

竝轡西遊疊石溪斷崖環合與雲齊飛泉亦有畱人

意肯負他年向此棲

疊石溪在縣南五六里

十日西過永濟橋

唐橋名

十日西行過永濟時時細雨溼衫衣多情會得山神意猶恐行人欠翠微

過宜陽城二首

六國區區共事秦疲於奔命尚難親如何殺盡半天下豈是關東沒一人

當日宜陽號別都奈何韓國特區區子房不得宣遺恨博浪沙中中副車

十一日福昌縣會雨

雲勢移峰緩泉聲出竹遲此時無限意唯有翠禽知
依韻和壽安尹尉有寄

不向紅塵浪著鞭殊無才業合時賢本酬壯志都無效欲住青山却有緣翠竹陰中開縹帙白雲堆裏揖飛泉錦幘正與南溪對他日從遊子子傳

十二日同福昌令王贊善遊龍潭

潭在南山去縣十五里

二潭冷浸崖根黑數峰高入雲衢碧遊人屏氣不敢言長恐雷霆奮於側

水邊靜坐天將暮猶自盤桓未成去馬上迴頭更一觀雲煙已隔無重數

十三日遊上寺北在縣及黃澗西在縣

能休塵境為真境未了僧家是俗家不向此中尋洞府更於何處覓藏花

堪嗟五伯爭周燼可笑三分拾漢餘何事不才閒處坐平時雲水遶衣裾

十四日畱題福昌縣宇之東軒

洛川秋入景尤佳微雨初過徑路斜水竹洞中藏縣宇煙嵐塢裏住人家霜餘紅間千重葉天外晴排數縷霞溪淺溪深清激灑峰高峰下碧查牙鳥因擇木飛還遠雲為無心去史除蓋世功名多齟齬出羣才

業足咨嗟浮生日月仍須惜半老筋骸莫強誇就此巖邊宜築室樂吾真樂樂無涯

十五日別福昌因有所感

連昌宮廢昌河在事去時移語浪傳下有荒祠難問處古槐枝秃竹參天

是夕宿至錦嶓山下

尋常看月亦嬋娟不似今宵特地圓青疑是素娥紆宿憾相逢為在錦嶓前

十六日依韻酬福昌令有寄

道義相歡豈易親古稱難處是知人文章不結市朝

士榮辱非關雲水身話入精詳皆物理言無形跡盡
天真他時洛社過從輩圖牒中添又一鄰

十七日錦幘山下謝城中張孫二君惠茶

山似接藍波似染遊心一句難拘檢仍攜二友所分
茶每到煙嵐深處點

壽安縣晚望

休歎浮生榮與辱且聽終日水潺潺遙穿冥靄孤鴻
去橫截野煙雙鷺還佳樹又作老木排青巖下圃好峰環
翠縣前山報言名利差輕者少輟光陰到此間

十八日逾寧平坂南達伊川墳上

三尺荒墳百尺山生身慈愛在其間此情至死不能
盡日算徘徊又且還

思程氏父子兄弟因以寄之

年年時節近中秋佳水佳山爛熳遊此際歸期為君
促伊川不得久遲留

氣候如當日山川似舊時獨來還獨往此意有誰知

十九日歸洛城路遊龍門

伊川往復過龍山每過龍山意且閒莫道移人不由
境可堪深著利名間

無煩物象弄精神世態何常不喜新唯有前墀好風

月清光依舊屬閒人

畱題龍門

融結成來不記秋，斷崖蒼壁鎖煙愁。
中分洪造夏王力，橫截大山伊水流。
八節灘聲長在耳，一川風景盡歸樓。
行人莫動凭欄興，無限英雄浪白頭。
誰將長劍斬長蛟，斬斷長蛟劍復韜。
爪尾蜿蜒凝華嶽，角牙獍惡結嵩高。
骨傷兩處嶄蒼壁，血出東流洶巨濤。
此物猶難保身首，爲言讒口莫嗷嗷。

龍門石樓看伊川

數朝從款走煙霞，縱意凭欄看物華。
百尺樓臺通鳥道，一川煙水屬僧家。
直須心逸方爲樂，始信官榮未足誇。
此景得遊無事日，也宜知幸福無涯。

二十日到城中見交舊

年年此際走煙嵐，人亦何嘗謂我貪。
歸見交親話清勝，且無防患在三緘。

二十二日晚步天津次日有詩

溪翁昨晚步天津，步到天津佇立頻。
洛水只聞煎去棹，西風唯解促行人。
山川慘淡籠寒雨，樓觀參差鎖暮雲。
此景分明誰會得，欲霜時候雁來賓。
二十五日依韻和左藏吳傳正寺丞見贈

上陽光景好看書非象之中有坦途良月引歸芳草
渡快風飛過洞庭湖不因赤水時時往焉有黃芽日
日娛莫道天津便無事也須閒處著工夫來詩云從此天津南

畔景不教都屬邵堯夫故有是句

二十九日依韻和洛陽陸剛叔主簿見贈

一霎蕭蕭晚雨餘鳳凰樓下偶驅車
却說片玉知能挹樂廣青天幸未疎
相濶夏秋聞甚事可親燈火讀何書
恨無束帛嘉程子徒自悄悄返弊廬

伊川擊壤集卷五

終校改四字四月十二日沈林

伊川擊壤集卷六

代書寄劍州普安令周士彥屯田

作官休用歎奚為未有升高不自卑
君子屈伸方為道吾儒進退貴從宜
即今彭澤歸何地他日東門去未遲
痛恨伊嵩景無限一名佳處重來資

二蜀至三吳中間萬里餘去年方北望
今歲復西驅劍閣離天日秦川限帝都
臨風相憶處能飲一盃無

又一絕

正當老輩過從日況值高秋搖落天
一把黃花一罇酒故人西去又經年

和趙克德祕丞見贈

人言人事危冠冕吾愛吾廬遠市朝野面不堪趨魏
闕聞身唯稱訪楊家殊無紀律詩千首富有雲山酒
一瓢預惜軒車又東去自茲風月恐難招

和王不疑郎中見贈

二十年來住洛都眼前人事任紛如形同草木何勝
野心類鐘彝不啻虛已沐仁風深骨髓更驚詩思劇
瓊瑤莊周休道虧名實自是無才悅衆狙

和魏教授見贈

清世文章日月懸無才唯幸樂豐年遊山太室更少

室看水伊川又洛川古有孟軻難語覺時無顏子易
爲賢讀書每到天根處長懼諸公問極玄

和吳冲卿省副見贈

非有非無是祖鄉都來相去一毫芒人人可到我未
到物物不妨誰與妨失卽肝脾爲楚越得之藜藿是
膏粱一言千古難知處妙用仍須看呂梁

和孫傳師祕教見贈

天津南畔是吾廬時荷夫君枉乘車始爲退來忘檢
束却因闕久長空疎與其功業逋青史孰若雲山負
素書一片丹誠最難狀庶幾長得類舟虛

依韻和陳成伯著作長壽雪會

瓊苑羣花一夜新
瑤臺十二玉爲塵
城中竹葉湧增價
坐上楊花盛學春
時會梁園皆墨客
誰思姑射有神人
餘糧豈止千倉望
盈尺仍宜莫厭貧

依韻和陳成伯著作史館園會上作

竹遶長松松遶亭
令人到此骨毛清
梅稍帶雪微微坼
水脉連冰澹澹鳴
殘臘歲華無柰感
半醺襟韻不勝情
誰憐相國名空在
吾道如何必可行

和夔峽張憲白帝城懷古

不憤曹公跨許昌
苟非梁益莫爭王
三分區宇風雷

惡橫截西南氣勢強
行客往來開指點
史官褒貶浪文章
後人未識興亡意
請看江心舊戰場

閒適吟

熙寧元年

爲士幸而居盛世
住家況復在中都
虛名浮利非我有
淥水青山何處無
選勝直宜尋美景
命儔須是擇吾徒
樂開本屬閒人事
又與偷閒事更殊

六尺眼前安樂身
四時爭忍負佳辰
溫涼氣候二八月
道義賓朋三五人
量力盃盤隨草具
開懷語笑任天真
勸君似此清閒事
雖老何須更厭頻
莫將真氣助憂傷
憤死英豪世更長
陌上雖多馬跳

躍天邊亦有鳳翱翔三千賓客磨圭角百二山河擁
 劍鉞等是一場春夢過自餘惡足更悲涼
 南窗睡起望春山山在霏霏煙靄間千里難逃兩眼
 淨百年未見一人開情如落絮無高下心似遊絲自
 往還又恐幽禽知此意故來枝上語綿蠻
 誰將造化屬東風一屬東風事莫窮殘臘也宜先作
 策新正其那便要功柳梢借暖渾搖軟梅萼偷春半
 露紅安得歸時情意在輕衫撩亂少年中

桃李吟

桃李因風花滿枝因風桃李却離披慘舒相繼不離

手憂喜兩般都在眉泰到盛時須入蠱否當極處却
 成隨今人休愛古人好只為今人生較遲

傷心行

不知何鐵打成針一打成針只刺心料得人心不過
 寸刺時須刺十分深

傷二舍弟無疾而化

手足情深不可忘割心猶未比其傷急難疇昔爾相
 濟終鮮如今我遂當鞞鞞棣開無竝萼邕邕雁去破
 初行自茲明月清風夜蕭索東籬看斷腸

渠重九詩云木如當月白花似昔年
 黃擬問東籬事東籬事渺茫語類識

賜斷東籬何所尋東籬從此事沉沉差肩行處皆成
往弔影傷時無似今清淚已乾情莫極黃泉未到恨
非深不知何日能消盡三十二年雍睦心

又一首

兄既名雍弟名睦弟兄雍睦情何足居常出入畱一
人奉親教子如其欲慈父享年七十九四人稚子常
相逐其間同戲彩衣時堂上愉愉歡可掬慈父前年
忽傾逝爾弟今年命還促獨予奉母引四子日對几
筵相向哭不知腸有幾千尺不知淚有幾千斛斷盡
滴盡無奈何曷日恩光焉可贖

又一絕

手足恩情重墳笮歡樂長要知能忘處墳草兩荒涼
聽杜鵑思亾弟

嘗憶去年初夏時與爾同聽杜鵑啼杜鵑今年又復
至還是去年初夏時禽鳥亦知人意切一聲未絕一
聲悲腸隨此聲既已斷魂逐此禽何處飛

書亾弟殯所

後乎吾來先乎吾往當往之初殊不相讓

南園南晚步思亾弟

南園之南草如茵迎風晚步清無塵不得與爾同歡

欣又疑天上有飛雲一片世間來作人飄來飄去殊無因

自憫

天無私覆古今同手足情多驟一空五七年來併家難六十歲許更頭風常情不免順世俗私計固難專僕童安得仙人舊查在伊川雲水樂無窮

戊申自貽

雖老仍思鼓缶歌庶幾都未喪天和明夷用晦止于是無妄生災終奈何似箭光陰頭上去如麻人事眼前過中間若不自爲計所損其來又更多

代書寄北海幕趙充道太博

熙寧二年

自從終鮮罷吟哦聊爲臨風一浩歌別易會難情不已登高望遠興如何百年可惜時無再千里相思事更多今日樽罍真北海況君雅重幾人過

依韻和王不疑少卿見贈

不把憂愁累物華光陰過眼疾如車以平爲樂忝知分待足求安恐未涯食罷有時尋蕙圃睡餘無事訪僧家天津風月勝他處長是思君共煮茶

仁者吟

仁者難尋思有常平居慎勿恃無傷爭先徑路機關

惡近後語言滋味長爽口物多須作疾快心事過必
爲殃與其病後能求藥不若病前能自防

東軒消梅初開勸客酒二首

爲愛消梅勝早梅數枝先發日徘徊若教嶺表臘前
盡安有洛陽正後開香逐暖風初出谷艷隨芳酒正
浮醅佳賓會取東君意莫負乘春此際來
春色融融滿洛城莫辭行樂慰平生深思賢友開眉
笑重惜梅花照眼明況是山翁差好事可憐芳酒最
多情此時不向樽前醉更向何時醉太平

清風長吟

宇宙中和氣清冷無比方與時蠲疾病爲歲造豐穰
起自青蘋末來從翠樹傍得逢明月夜便入故人鄉
密葉搖重幄殷花舞靚粧兩三聲迥笛千萬縷垂楊
細度絲桐韻深傳蘭蕙香樓臺臨遠水軒檻近脩篁
盛夏驅煩暑初晴送晚涼輕披綠荷芰緩透薄衣裳
浪走翩翩袂波生澌澌觴閑愁難著莫幽思易飛揚
快若乘天馬醒如沃蔗漿面前遊園苑坐上泛瀟湘
不可將錢買焉能用斗量依憑全藉德收貯豈須倉
無患兼并取寧憂寇盜攘以茲爲樂事未始有憂傷

垂柳長吟

垂柳有兩種有長有短垂唯茲長一種偏與靜相宜
院宇深春後亭臺晚景時不勝煙冪冪無奈日遲遲
霖霖雨初過清冷風乍吹章臺街左右華表柱東西
起眼出墻樹拂頭當路枝翩翩綠羅帶縹緲縷金衣
蕩颺飄晴絮繽紛舞暖絲絲牽寸腸斷絮入萬家飛
婀娜王恭韻婆婆姿趙后姿修妍張緒少柔軟沈侯羸
濯濯青拖地甍甍翠遶池般添花灼灼引惹草萋萋
鬱鬱籠山館疎疎映酒旗贈人人自泣駐馬馬還嘶
影裏咿啞去陰中輾轉歸淒涼裝暝靄淡薄掛斜暉
懊惱輕攀折憂愁重別離早衰緣傍道先茂爲臨溪
樓外蟬纔噪橋邊鶯又啼生憎遮望眼死恨學粧眉
遠客莫知數長條曾繫誰經霜儘憔悴來歲却依依

落花長吟

以酒戰花穠花穠酒更濃花能十日盡酒未百壺空
尚喜裝衣袂猶憐墜酒鍾多情唯粉蝶薄倖是遊蜂
減却墻頭艷添爲徑畔紅飄零深院宇點綴靜簾櫳
又恐隨流水仍憂嫁遠風水流猶委曲風遠便西東
狼籍殘春後離披晚照中亭臺雖有主軒騎斷無蹤
劔去擁妃子兵來圍石崇馬嵬方戀戀金谷正怱怱
曹植辭休切襄王夢已終謬稱尋洛浦浪說數巫峰

燕訴冤還在鶯傳信莫通苔錢如可買柳線自能縫
悵望尤真宰淒涼殫化工放教成爛熳不使略從容
命掃心爭忍言收計遂窮異香銷骨髓絕色死英雄
任詫回天力饒矜蓋世功奈何時既往到了事難重
開謝形相戾興衰理一同天機之淺者未始免忡忡

芳草長吟

芳草更休生芳罇更不傾草如生不已罇豈便能停
雨後閑池閣春深小院庭是時簾半卷此際酒初醒
密密嫩方布茸茸綠已成送迴殘照淡引起曉寒輕
靜襯花村薄閑裝竹塢清溪邊微水浸原上未春耕

莫遣香車輾休教細馬行藉餘無限意望久不勝情
臺迥眉初斂樓危眼乍明低低暮雲碧隱隱遠山青
翠接鴛鴦浦萋連楊柳汀江潭夜帆落海渚晚舟橫
戾壘角一弄牧童笛數聲沙頭雙鷺下渡口亂鴻驚
蒼鬱出征地芊綿奉使程遠披來往路遍遶短長亭
苒苒秦皇墓離離漢帝城荒涼故銅雀破碎舊金陵
霧鎖前朝事煙昏後世名枯猶藏狡兔腐亦化流螢
縱刻奚由盡纔燒又却榮徒能蔽京觀仍願且升平

春水長吟

春在水自淥春歸淥遂休清非不逮淥春奈勝于秋

淥向陽中得清於冷上求加於清一等用是淥為優
 薄薄冰初泮微微雨乍收渺瀰新島嶼澗澗舊汀洲
 荷芰低猶卷菰蒲嫩已抽蘋蘩雖漸出藻荇未全稠
 日暖鴛鴦浴煙晴翡翠游波平躍雙鯉風靜戲羣鷗
 西蜀遊爭舉東甌襖競修武陵花再識漢曲珮還投
 臺下溶溶過堤邊漫漫流檻前纔泚泚天外更悠悠
 泛濫情懷惡潺湲意思幽遠山遮不斷一作別浦去
 難留二月溪橋畔三吳野渡頭依前橫兩槳特地送
 孤舟畫手方停筆騷人正倚樓長江飛絮外只是動
 離愁

花月長吟

少年貪讀兩行書人世樂事都如愚而今却欲釋前
 憾奈何意氣難如初每逢花開與月圓圓一般情態還
 何如當此之際無詩酒情亦願死不願甦花逢皓月
 精神好月見奇花光彩舒人與花月合為一但覺此
 身遊藥珠又恐月為雲阻隔又恐花為風破除若無
 詩酒重收管過此又却成輕辜可收幸有長詩篇可
 管幸有清酒壺詩篇酒壺時一講長如花月相招呼
 有花無月愁花老有月無花恨月孤月恨只憑詩告
 訴花愁全仰酒支梧月恨花愁無一點始知詩酒有

功夫些兒林下閒疎散做得風流罪過無

同府尹李給事遊上清宮

洛城二月春搖蕩桃李盛開如步障高花下花紅相
連垂楊更出高花上閒陪大尹出都門邛阜真宮共
尋訪不見翠華西幸時臨風盡日獨惆悵

乞笛竹栽於李少保宅

浪種閑花占地生未嘗容易暫畱情奈何苦愛凌霜
節一作物況是猶存鏤管名待鳳至時當有實學龍吟
處豈無聲幽人願乞數枝種得自君家又更榮

思山吟

看卽青山與白雲尋思沒量大功勳未知樂處緣何
事豈止飢時會茹葷千首拙詩難著怨一樽芳醕別
涵春壺中日月長多少能老紅塵幾輩人
祇恐身開心未開心閒何必住雲山果然得手情性
上更肯埋頭利害間動止未嘗防忌諱語言何復著
機關不圖爲樂至于此天馬無蹤自往還

恨月吟

我儂非是惜黃金自是常娥愛負心初未上時猶露
滴怡纔圓處便天陰欄干倚了還重倚芳酒斟迴又
再斟安得深閨與收管奈何前後誤人深

愁花吟

三千宮女衣宮袍望幸心同各自嬌初似綻時猶淡
薄半來開處特妖饒檀心未吐香先發露粉既垂魂
已銷對此芳樽多少意看看風雨騁麤豪

和張子望洛城觀花

造化從來不負人萬般紅紫見天真滿城車馬空撩
亂未必逢春便得春

落花短吟

滿園桃李正離披更被狂風非意吹長是憂愁初謝
處却須思念未開時奈何紅艷易消歇不似青陰少

改移九十日春都去盡樽前安忍更顰眉

芳草短吟

花間水畔綠如茵興廢曾經漢與秦占了山川無限
地愁傷今古幾何人嚴霜殺盡還逢雨野火燒殘又
遇春不那路傍多此物農家長是費耕耘

垂柳短吟

臨溪拂水正依依更被狂風來往吹薄暮不勝煙霧
幕深春無奈日遲遲誰家縹緲青羅帔何處蹁躑金
縷衣猶恐離人腸未斷滿天仍著亂花飛

春水短吟

觀洛城花呈
先生門人張瞻
平生自是愛
花人到處尋
芳不過真祇
道人間無正
色今朝初見
洛陽春

雪消冰泮淥盈溝翡翠鴛鴦得志秋長恨遠山遮不
斷又疑別浦去難留遠堤楊柳輕輕拂近岸新蒲細
細抽滿眼煙波杳無際三吳特地送孤舟

清風短吟

清風興況未全衰豈謂天心便棄遺長具齋莊緣讀
易每慙疎散爲吟詩人間好景皆輸眼世上閒愁不
到眉生長太平無事日又還身老太平時

暮春寄李審言龍圖

年年長是怕春深每到春深病不任傷酒情懷因小
會養花天氣爲輕陰歲華易革向來事節物難迴老

去心唯有前軒堪靜坐臨風想望舊知音

初夏開吟

綠楊深處囀流鶯鶯語猶能喜太平人享永年非不
幸天生珍物豈無情牡丹謝後紫櫻熟芍藥開時斑
笋生林下一般開富貴何嘗更肯讓公卿

代書答開封府推官姚輔周郎中

世態其如與願違必須言進是無知遍將底事閒思
處不若西街極論時設有奇才能動世奈何雙鬢已
如絲天邊新月從來細不爲人間愛畫眉

恐不容久
居林下矣

來書云願
先生自愛

四月十二日午後校畢改八字補詩一首 萊娛室主人

伊川擊壤集卷六終

伊川擊壤集卷七

代書寄濠倅張都官

多慙吾亦未知音天樂雖聞不許尋
惠子相時情自好莊生遊處意能深
閒來略記一春事老去難忘三
里心洛社交朋每相見爲吾因掉白頭吟
詔三下答鄉人不起之意

生平不作皺眉事天下應無切齒人
斷送落花安用雨裝添舊物豈須春
幸逢堯舜爲真主且放巢由作野臣
六十病夫宜揣分監司無用苦開陳
和王安之少卿韻

却恐鄉人未甚知相知深後又何疑貧時與祿是可
受老後得官難更爲自有林泉安素志況無才業動
丹墀荀楊若守吾儒分免被韓文議小疵

依韻和劉職方見贈

造物工夫意自深從吾所樂是山林少因多病不干
祿老爲無才難動心花月靜時行水際蕙風香處卧
松陰閒窗一覺從容睡願當封侯與賜金

代書謝王勝之學士寄萊石茶酒器

東山有石若瓊玖匠者追琢可盛酒君子得之惜不
用慙慙遠寄林下叟林叟從來用瓦盞驚惶不敢擊

此處有王益
柔寄邵先生
詩一首別寫
於後

上手重誠兒童無損傷緘藏復以待賢友未知賢友
何時歸男子功名未成就朝廷先從憂者言方今莫
如二虜醜漢之六郡限遼西唐之八州隔山後自餘
甘沙甘與涼中原久而不能有奈何更餌以金帛重
困吾民猶掣肘若非堂上出奇兵安得闔外拉餘朽
直可逐去此腥羶西出玉門北逾口城下狐狸旣不
存路上豺狼自無走太陽烜赫耀天衢氛妖接變匿
塵垢功成不肯受上賞印解黃金大于斗乞洛辭君
出國門歸鞍暖拂天街柳千官如壁遮道畱仰面弄
轡不回首鄉人夾路迎大尹醉擁旌幢錦光溜下車

專身集卷七
二
舊墓還政餘不訪公門訪親舊始知此器用有時吾
喜爲君獻眉壽

崇德閣下答諸公不語禪

浩浩長空走日輪何須苦苦辨根塵鵬程萬里非由
駕鶴算三千別有春鉛錫點金終屬假丹青畫馬安
求真請觀風急天寒夜誰是當門定脚人

天宮小閣倚欄

六尺殘軀病復羸況堪日日更添衰滿懷可惜精明
處一語未能分付時沙裏有金然索揀石中韞玉奈
何疑此情牢落西風暮倚遍欄干人不知

代書寄華山雲臺觀武道士

太華中峰五千仞下有大道人往還當時馬上一迴
首十載夢魂猶過關生平愛山山未足由此看盡天
下山求如華山是難得使人消得一生閒

代書寄長安幕張文通

無學又無謨胸中一向虛枯腸忻飲酒病眼怕看書
洛浦輕風裏天津小雨餘故人千里隔相望意何如
和人間韓魏公出鎮永興過洛

佐命三朝爲太宰名垂千古號元功栽培桃李滿天
下出入風濤半海中虎帳夜寒心益壯鳳池波暖位

專境集卷七
三
猶空君王鼎盛子儀在萬里河湟不足攻

代書寄白波張景真輦運

秋入山河氣象雄不堪閒望老年中金蘭契重思無限手足情多感未終半局殘棋消白晝一簪華髮亂西風唯君父子相知久松桂心同色更同

代書寄鄞江知縣張太博

長憶當年掃弊廬弟兄同受策名初一生不記尋常事千里猶通咫尺書風月遙知四明好江山況是九秋餘片帆未得開飛去徒見巖君問起居

先幾吟

先幾能識是吾信慎勿輕爲世俗哈把似衆中呈醜拙爭如靜裏且談諧奇花萬狀皆輸眼明月一輪長入懷似此光陰豈虛過也知快活作人來

秋暮西軒

遶欄種菊一齊芳戶牖軒窗總是香得意不能無興詠樂時况復遇豐穰深秋景物隨宜好向老筋骸粗且康飲罷何妨更登眺爛霞堆裏有斜陽

天津閒步

洛陽城裏任西東二十年來放盡慵故舊人多時款曲京都國大體雍容池平有類江湖上林靜或如山

谷中不必奇功蓋天下開居之樂自無窮

寄和長安張強二機宜

二公詩美過連城欲報才非禰正平本謂柏舟終不
遇却驚華袞重爲榮岷峨雨後方知峭風月霜餘始
見清前有古人稱寡和陽春白雪豈虛名

代書答淮南憲張司封

緣木求魚固不能緣魚求炙恐能行與其病後求良
藥不若醉時辭大觥芝草無根休用種蟠桃有實豈
難生荷君見愛情非淺一芥還同一芥榮

偶得吟

集大成人不肯模却行何異棄金車便言天下無難
事豈信人間有丈夫天意順時爲善計人情安處是
良圖天人之際只些子過此還同隔五湖

代書寄友人

一別光陰二紀餘歲華如箭止堪吁東西契濶久經
難前後慇懃兩得書故國山川皆夢寐舊家人物半
丘墟何時重講當時事笑對西風坼酒壺

風吹木葉吟

熙寧三年

風吹木葉不吹根慎勿將根苦自陳天子舊都闢好
住聖人餘事冗休論長年國裏神仙侶安樂窩中富

貴人萬水千山行已遍歸來認得自家身

閒行吟

長憶當年掃弊廬未嘗三徑草荒蕪欲爲天下屠龍
手肯讀人間非聖書否泰悟來知進退乾坤見了識
親疎自從會得環中意開氣胸中一點無

投吳走越覓青天殊不知天在眼前開眼見時猶有
病舉頭尋處更無緣顏淵正在如愚日孟子方當不
動年安得功夫遊寶肆愛人珠貝重憂錢

買卜稽疑是買疑病深何藥可能醫夢中說夢重重
妄牀上安牀疊疊非列子御風徒一本作猶有待夸夫逐

日豈無疲勞多未有收功處踏盡人間闢路歧

對花飲

人言物外有煙霞物外煙霞豈足誇若用較量爲樂
事但無憂撓是仙家百年光景畱難住十日芳菲去
莫遮對酒有花非負酒對花無酒是虧花

春盡後園閒步

綠樹成陰日黃鶯對語時小渠初澗灑新竹正參差
倚杖閒吟久攜童引步遲好風知我意故故向人吹

代書寄吳傳正寺丞

敦篤情懷世所稀昔年今日事難追雪霜未始寒無

甚松桂何嘗色暫移洛邑士人雖我信天津風月只
君知夢魂不悟東都遠依舊過從似舊時

洛下園池

洛下園池不閉門洞天休用別尋春縱遊只却輪闌
客遍入何嘗問主人更小亭欄花自好儘荒臺榭景
纔真虛名誤了無涯事未必虛名總到身

夢過城東謁洛陽尉楊應之

夜來清夢過城東溪水分流徑路通全似乘車上天
漢但無嚴子驗行蹤

代書寄前洛陽簿陸剛叔祕校

洛城官滿振衣裾塵土何由浼遠途道在去逢清日
月眼明應見舊江湖知行知止唯賢者能屈能伸是
丈夫歸去何妨趁殘水三吳還似嚮時無

答人乞碧蘆

草有可嘉者莫將蕭艾儔扶疎全類竹蒼翠特宜秋
風雨聲初入江湖思莫收無功濟天下藉此一淹留

逍遙吟

吾道本來平人多不肯行得心無厚味失脚有深坑
若未通天地焉能了死生向其間一事須是自誠明
人生憂不足足外更何求吾生雖未足亦也却無憂

天和將酒養真樂用詩勾不信年光會催人早白頭
夜入安樂窩晨興飲太和窮神知道泰養素得天多
日月任推盪山川徒琢磨欲求爲此者到了是誰何
何事感人深求之無處尋兩儀長在手萬化不關心
石裏時藏玉砂中屢得金分明難理會須索入沉吟

偶得吟

相去一毛間千山復萬山雖能忘寢食未肯去機關
不是責人備奈何開口難天心況非遠旣遠遂無還

每度過東隣

每度過東隣東隣愈覺懃旣來長自愧相見只如親

飲食皆隨好兒童亦自忻吾鄉有是樂何必更求仁

每度過東街

每度過東街東街怨暮來只知閑說話那覺太開懷

我有千般樂人無一點猜半醺歡喜酒未晚未成迴
君子與人交

君子與人交未始無驚惕小人與人交未始無差忒
祇此真喜歡也宜重愛惜他年雲水疎亦恐難尋覓

唯天有二氣

唯天有二氣一陰而一陽陰差產蛇蝎陽和生鸞凰
安得蛇蝎死不爲人之殃安得鳳凰生長爲國之祥

無客迴天意

無客迴天意有人資盜糧日中屢見斗六月時降霜
有書不暇讀有食不暇嘗食況不盈缶書空堆滿牀
惡死而好生古今之常情人心可生事天下自無兵
草木尚咸若山川豈不寧胡爲無擊壤飲酒樂昇平

放小魚

織鮮鱗不足畱此失一生休放爾江湖去寬渠鼎鑊遊
更宜深避網慎勿悞吞鈎天下多庖者無令落庶羞

依韻和田大卿見贈

日日步家園清風不著錢城中得野景竹下弄飛泉
自顧無嗟若何妨養浩然却慙天下士語道未忘筌

乞笛竹

洛人好種花唯我好種竹所好雖不同其心亦自足
花止十日紅竹能經歲綠俱霑雨露恩獨無霜雪辱
依韻和王不疑少卿招飲

經難憶浮丘吾鄉足勝遊風前驚白髮雨後喜新秋
仕宦情雖薄登臨興未休人間浪憂事都不到心頭
再和王不疑少卿見贈

乍涼天氣好何處不堪遊鴻雁來賓日鷹鷂得志秋
忘形終夕樂失脚一生休多少江湖上舟船未到頭

依韻和三王少卿同過弊廬

安之不疑中美

洛中詩有社馬上句如神白首交情重黃花節物新
見過心可荷知愧道非淳寂寞西風裏身開半古人

代書寄南陽太守呂獻可諫議

一別星霜二紀中升沉音問不相通林間談笑須歸
我天下安危宜繫公萬乘几前常蹇諤百花洲上略
從容不知月白風清夜能憶伊川舊釣翁

寄吳傳正寺丞

天津風月一何孤似我經秋相憶無每仗晴波寄聲
去不知曾得到東都

寄前洛陽簿陸剛叔祕校

洛陽官滿歸吳會男子雄圖志未伸若到江山最佳
處舉盃無惜望天津

依韻和淮南憲張司封

庭梧葉半黃籬菊初受霜向晚意不快把酒西南望
望君不見君但見鴻南翔正欲思寄書自成書數
行

重陽前一日作

近來多病不堪言長欲醺醺帶醉眠新酒乍逢重九
日好花初接小春天自知命薄臨頭上不願事多來

此下有誨
蒼堯夫見
寄一首

眼前唯有天津橫落照水聲仍是舊潺湲

重九日登石閣三首

人情見了多世態諳來久事過憂噬臍物傷防掣肘
水濁更澄濾衣塵須抖擻必欲論主衡何人爲好手
事出一時間時過事莫還當時深可愛過後不堪看
夏去休言暑冬來始講寒人能知此理憂患自難干
今歲重陽日凭欄氣候遲雲煙雖已淡林木未全衰
天地開懷處山川快眼時欄干空倚遍此意有誰知

依韻答友人

百萬貔貅動塞塵朝廷委寄不輕人胡兒生事雖然
淺國士盡忠須是純隴上悲歌應憤惋林間酣飲但
酸辛欲陳一句好言語只恐相知未甚真

偶見吟

富貴多傲人人情有時移道德不做人人情久益歸
道德有常理富貴無定期蒿萊霜至萎松柏雪更滋
世人多附炎炎歇人自去君子善處約約久情自固
炎歇勢不迴情固人不去路人或如親親人却如路
心跡貴相親相親善惡分世間須有物天下豈無人
既見薰蕕臭當思玉石焚如何得時態長似洛陽春

無題吟

昔日不鍊物嘗為物所誤今日不鍊人又為人所怒
物誤亦可辯人怒難任訴我對人稱過人亦為我恕

無酒吟

自從新法行嘗苦轉無酒每有賓朋至盡日閑相守
必欲丐于人交親自無有必欲典衣買焉能得長久

讀陶淵明歸去來

歸去來兮任我真事雖成往意能新何嘗不遇如斯
世其那難逢似此人近暮特嗟時翳翳向榮還喜木
欣欣可憐六百餘年外復有閑人繼後塵

伊川擊壤集卷七

終校改十四字補詩二首沈林勘宋刊殘本
乙丑四月十日